

Мұміндердің Анасы – Зәйнәб Хузәймақызы (оған Аллаh разы болсын) туралы қисса

قصة أم المؤمنين زينب بنت خزيمة رضي الله عنها

<Қазақ тілі – Kazakh – كازاخ>



فريق اللغة الكازاخية بدار الإسلام

Islamhouse.com сайтының қазақ тілі бөлімшесі



МУМІНДЕРДІҢ АНАСЫ – ЗӘЙНӘБ ХУЗӘЙМАҚЫЗЫ

(АЛЛАҢ ОҒАН РАЗЫ БОЛСЫН)

Мұқтаждар мен міскіндердің анысы, мейірімділік пен қайырымдылық анысы.

Ол Аллаң елшісінің (оған Аллаһтың салауаты мен сәлемі болсын) үйінде бар-жоғы 8 ай тұрып, жарық дүниемен қош айтысқан. Зәйнәб Бәдір соғысында жекпе-жекте шәһид болған Ғұбайдада ибн Харис әл-Мутталибидің (Аллаң оған разы болсын) жесірі еді. Зәйнәб күйеуі шәһид болған кезде жарапыларға көмек көрсетіп, жарақаттарын таңумен шұғылданып жүрген-ді. Күйеуінің қазасы оны өз міндетін орындаудан тоқтатқан жоқ. Ол мұшріктермен арадағы алғашқы соғыста Аллах тағала мұсылмандарға жеңіс бергенше, өзіне жүктелген міндетті абыраймен атқарған. Зәйнәбтің төзімділігін, табандылығын, сабырлылығын көрген Пайғамбарымыз (оған Аллаһтың салауаты мен сәлемі болсын) күйеуінен айырылған оған сүйеніш таныту мақсатымен өзіне некелеп, оны «мұміндердің анысы» дәрежесіне көтерген.

Толық есімі – Зәйнәб бинт Хузәйма ибн Харис ибн Омар әл-Ҳилэлия.

Анасы – Һинд бинт Ауф ибн Зұһайр ибн Харис әл-Химәрия. Ол жайлы «Арабтарда Һинд Ауфқызындай мәртебелі күйеу балаларымен танымал әйел жоқ» делінетін. Себебі оның қыздары Әбу Бәкір Сыддық, Абдулмутталибтің ұлдары Хамза және Аббас сияқты құрайыштардың беделді де абырайлы адамдарына тұрмысқа шыққан. Сондай-ақ бұл кісі Аллаң елшісінің (оған Аллаһтың салауаты мен сәлемі болсын) тағы бір әйелі – Мәймуна Харисқызының, Жағфар ибн Әбу Талибтің әйелі – Әсмә Умәйсқызының, Хамза ибн Әбу Талибтің әйелі – Сәлмә Умәйсқызының шешесі еді.

Һинд Хадишадан (Аллаң оған разы болсын) кейін Исламды қабылдаған екінші әйел. Сондай-ақ тарихта оның Әбу Ләһәбты ұрғаны жайлы дерек бар. Бұл алғашқы Бәдір шайқасында құрайыштар жеңіліс тапқан кезде орын алған жайт еді.

Мұсылмандардың жеңісі жайлы хабар Меккеге жеткенде, Әбу Ләһәб ызадан булығып, аласұрып кетеді. Бұған шыдамаған Һинд Ауфқызы оның басынан таяқпен бір салады. Тиген соққының қаттылығы соншалық, төбе құйқасынан саулап қан ағады. Әбу Ләһәб бұл соққыдан ұзақ уақыт зардал шегіп, ақыры осының салдарынан өледі. Өлер шағында одан әйел, бала-шағасының барлығы теріс айналған-ды, Аллаһтың оған лағынеті болсын!

Зәйнәб Аллаһ елшісі (оған Аллаһтың салауаты мен сәлемі болсын) үйінің босағасын Хафса Омарқызынан кейін аттаған мұміндердің бесінші анасы еді. Ол өмірімен қош айтысқанда отызға да толмаған-ды.

Қысқа ғұмырын кедей-кепшік пен мұқтаждарға қарайласумен өткізген Зәйнәб, өзін материалдық қажеттіліктер мен дүниелік қызықтардан қашық ұстайтын. «Мұқтаждар мен міскіндердің анасы» деген атына заты сай Зәйнәбтің құштар нәрсесі кедей-кепшікті азғантай болса да бірденемен қуанту болатын.

Зәйнәб кез жұмғанда, жаназасын Аллаһ елшісі (оған Аллаһтың салауаты мен сәлемі болсын) шығарып, денесі Бақиғқа жерленеді. Ол – осы қорымда жерленген мұміндердің алғашқы анасы. Аллаһ оған разы болсын! Сондай-ақ ол – Пайғамбарымыздың (оған Аллаһтың салауаты мен сәлемі болсын) көзі тірісінде дүние салған екінші әйелі. Мұміндердің анасы – Зәйнәб Хузәймақызын Аллаһ жарылқасын!